



## **PRAVILNIK**

**o prijavi i uvjetima za ovjeru političkog subjekta za učešće na Općim izborima 2026. godine**

Sarajevo, maj 2026. godine



Na osnovu člana 2.9 stav (1) tačka 2, a u vezi s članovima 4.4, 4.5 stav (2), 4.10, 4.11, 4.12, 4.13, 4.15, 4.19, 4.22 stav (1), 4.24, 15.1b i 15.1d, Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 33/08, 37/08, 32/10, 18/13, 7/14, 31/16, 41/20, 38/22, 52/22, 67/22 i 24/24), Centralna izborna komisija Bosne i Hercegovine je na 29. sjednici, održanoj 06. 05. 2026. godine, donijela

## PRAVILNIK

### **o prijavi i uvjetima za ovjeru političkog subjekta za učešće na Općim izborima 2026. godine**

#### **Član 1. (Predmet)**

Pravilnikom o prijavi i uvjetima za ovjeru političkog subjekata za učešće na Općim izborima 2026. godine (u daljem tekstu: Pravilnik) propisuju se način podnošenja prijava za ovjeru i uvjeti za ovjeru političke stranke, nezavisnog kandidata, koalicija i listi nezavisnih kandidata (u daljem tekstu: politički subjekt), način podnošenja potpisa podrške i uvjeti oslobađanja obaveze prikupljanja potpisa podrške te način provjere i potvrđivanja potpisa podrške, način podnošenja kandidatskih listi, visina novčanog iznosa takse uz prijavu za ovjeru političkog subjekta i izgled i sadržaj obrazaca za podnošenje prijava za ovjeru političkog subjekta, kao i izgled i sadržaj obrazaca kandidatskih listi i propisanih izjava, za učešće na Općim izborima 2026. godine.

#### **Član 2. (Način podnošenja prijava za ovjeru i komuniciranje između Centralne izborne komisije Bosne i Hercegovine i strana u postupku – članovi 4.4 stav (1), 4.10, 4.12, 4.15, 4.19 stav (4) i 4.24 Izbornog zakona BiH)**

(1) Prijava za ovjeru političkog subjekta, kao i prijave kandidata i kandidatskih listi podnose se isključivo elektronski, putem *online* portala Centralne izborne komisije Bosne i Hercegovine (u daljem tekstu: Centralna izborna komisija BiH) "e-Izbori". Pristup *online* portalu ostvaruje se korištenjem bilo kojeg internet-pretraživača, koristeći adresu izbornog portala Centralne izborne komisije BiH (<https://eizbori.izbori.ba>).

(2) Za otvaranje korisničkog računa i pristup *online* portalu "e-Izbori" politički subjekt dužan je podnijeti pisani zahtjev na način propisan Uputstvom o postupku dostavljanja, prijema, obrade i arhiviranja prijava političkog subjekta elektronskim putem (u daljem tekstu: Uputstvo).

(3) Nakon završenog unosa podataka, u skladu sa stavom (1) ovog člana, obrasce prijave sa svim potrebnim podacima, koje je potrebno odštampati, potpisati i ovjeriti, treba dostaviti neposredno u sjedište Centralne izborne komisije BiH, u propisanom roku za podnošenje prijava.

(4) U izbornom periodu komuniciranje između Centralne izborne komisije BiH i političkog subjekta odvija se:

- a) neposredno u sjedištu Centralne izborne komisije BiH,
- b) putem elektronske pošte,
- c) putem internet-portala "e-Izbori",
- d) putem telefaksa i
- e) putem telefona.

(5) Politički subjekt dužan je u prijavi za ovjeru navesti adresu sjedišta, broj telefona i telefaksa te e-adresu.

### **Član 3.**

#### **(Uvjeti za ovjeru prijave – članovi 1.6, 1.13, 4.3 i 15.1 Izbornog zakona BiH)**

(1) Politički subjekt uz prijavu za učešće na Općim izborima 2026. godine, pored potpisa podrške iz člana 4.4 Izbornog zakona BiH, podnosi sljedeću dokumentaciju:

- a) Rješenje o upisu u registar kod nadležnog organa za novoosnovane političke stranke, koje nije starije od 60 dana; ukoliko je Rješenje starije od 60 dana, dostavlja se originalni Izvod iz sudskog registra, koji nije stariji od 60 dana za ranije registrirane političke stranke, u skladu s članom 4.3 Izbornog zakona BiH (podnose samo političke stranke);
- b) izjavu propisanu članovima 1.6 i 1.13 Izbornog zakona BiH, potpisanu od strane predsjednika političkog subjekta, čija je vjerodostojnost potpisa potvrđena ovjerom nadležnog organa. Ova izjava može biti potpisana od strane predsjednika političkog subjekta i u sjedištu Centralne izborne komisije BiH, u prisustvu ovlaštenog službenog lica Centralne izborne komisije BiH. Prilikom potpisivanja izjave u sjedištu Centralne izborne komisije BiH, ovlašteno službeno lice Centralne izborne komisije BiH utvrđuje identitet predsjednika političkog subjekta na osnovu važećeg ličnog dokumenta;
- c) dokaz o uplaćenom novčanom iznosu takse za ovjeru, u skladu s članom 4. ovog Pravilnika;
- d) finansijski izvještaj koji obuhvata period od tri (3) mjeseca prije podnošenja prijave, u skladu s članom 15.1a Izbornog zakona BiH;
- e) potpisanu i ovjerenu izjavu kod nadležnog organa ili kod Centralne izborne komisije BiH da politički subjekt nema neizmirenih obaveza po osnovu pravosnažnih i izvršnih odluka o izrečenim novčanim kaznama koje je izrekla Centralna izborna komisija BiH, osim u slučaju da se plaćanje kazne vrši u ratama, u skladu s Odlukom Centralne izborne komisije BiH;
- f) broj računa za finansiranje izborne kampanje, u skladu s članom 15.1b Izbornog zakona BiH;
- g) Izvještaj o prometu posebnog računa za finansiranje troškova izborne kampanje, u skladu s članom 15.1d stav (1) Izbornog zakona BiH (izvodi banke s računa ili analitička kartica banke) i
- h) akt o određivanju ovlaštenog predstavnika koalicije/liste nezavisnih kandidata, potpisan od strane svih predsjednika političkih stranaka članica koalicije/svih nezavisnih kandidata (podnose koalicije i liste nezavisnih kandidata).

(2) Prijavni obrazac sa svim priložima utvrđenim u stavu (1) ovog člana politički subjekt dužan je u elektronskom obliku dostaviti putem *online* portala "e-Izbori" na način utvrđen Uputstvom.

(3) Originalnu dokumentaciju iz stava (1) ovog člana, nakon završenog unosa prijave, politički subjekt dužan je dostaviti lično u Centralnu izbornu komisiju BiH do roka utvrđenog za podnošenje prijave.

(4) Prijavu političkog subjekta koja nije podnesena u roku ili nije podnesena na način utvrđen u stavovima (2) i (3) ovog člana Centralna izborna komisija BiH odbacuje.

### **Član 4.**

#### **(Visina takse za ovjeru – član 4.16 stav (1) Izbornog zakona BiH)**

(1) Taksa za ovjeru prijave političkog subjekta za učešće na Općim izborima 2026. godine određuje se u visini novčanog iznosa, kako slijedi:

a) Političke stranke:

- 1) 30.000 KM za izbore za članove Predsjedništva Bosne i Hercegovine,
- 2) 30.000 KM za izbore za poslanike u Predstavničkom domu Parlamentarne skupštine Bosne i Hercegovine,
- 3) 20.000 KM za izbore za poslanike u Predstavničkom domu Parlamenta Federacije Bosne i Hercegovine, predsjednika Republike Srpske i poslanike u Narodnoj skupštini Republike Srpske i

- 4) 15.000 KM za izbore za poslanike u kantonalnim skupštinama u Federaciji Bosne i Hercegovine;

b) Nezavisni kandidati:

- 1) 15.000 KM za izbore za članove Predsjedništva Bosne i Hercegovine;
  - 2) 15.000 KM za izbore za poslanike u Predstavničkom domu Parlamentarne skupštine Bosne i Hercegovine;
  - 3) 10.000 KM za izbore za poslanike u Predstavničkom domu Parlamenta Federacije Bosne i Hercegovine, predsjednika Republike Srpske i poslanike u Narodnoj skupštini Republike Srpske i
  - 4) 8.000 KM za izbore za poslanike u kantonalnim skupštinama u Federaciji Bosne i Hercegovine.
- (2) Politička stranka i nezavisni kandidat obavezni su novčani iznos takse za ovjeru iz stava (1) ovog člana uplatiti sa svog transakcijskog računa, koji će se namjenski koristiti za izbornu kampanju tokom Općih izbora 2026. godine, i to na račun JRT broj: 0000030000000145 kod Centralne banke Bosne i Hercegovine, uz svrhu uplate: uplata takse na podračun Centralne izborne komisije BiH, broj 37111614.
- (3) Novčani iznos takse za ovjeru političke stranke ne uplaćuju pojedinačno za svaki organ vlasti, već uplaćeni iznos takse za ovjeru za viši organ vlasti važi i za niže nivoe organa vlasti, osim u slučaju kandidiranja za izbor članova Predsjedništva Bosne i Hercegovine.
- (4) Povrat uplaćenog novčanog iznosa takse za ovjeru utvrđen je članom 4.16 Izbornog zakona BiH.
- (5) Centralna izborna komisija BiH pokreće proceduru povrata novca kod nadležnog organa u roku od 15 dana od dana objavljivanja izbornih rezultata u službenim glasilima u Bosni i Hercegovini.
- (6) Sredstva koja ne budu vraćena političkom subjektu po osnovama navedenim u ovom članu postaju prihod budžeta institucija Bosne i Hercegovine i međunarodnih obaveza Bosne i Hercegovine.

### **Član 5.**

#### **(Način prikupljanja i unosa potpisa podrške – član 4.4 stavovi (2), (3), (4) i (5) Izbornog zakona BiH)**

- (1) Potpise podrške prikuplja lice zaduženo za njihovo prikupljanje i koje je odgovorno za vjerodostojnost prikupljenih potpisa birača koji podržavaju prijavu političke stranke ili nezavisnog kandidata (u daljem tekstu: potpisi podrške). Potpisi podrške prikupljaju se na obrascu koji je sastavni dio ovog Pravilnika, koji se preuzimaju i štampaju putem *online* portala “e-Izbori”.
- (2) Prikupljanje potpisa podrške vrši politička stranka ili nezavisni kandidat ličnim unosom podataka o biraču u obrascu i svojeručnim potpisivanjem birača u rubriku za potpis.
- (3) Obrazac obavezno sadrži podatke o licu koje je odgovorno za prikupljanje potpisa podrške, koje je dužno voditi računa da potpis birača mora odgovarati potpisu s identifikacionog dokumenta, u skladu s članom 5.13 stav (2) Izbornog zakona BiH.
- (4) Nakon prikupljenih potpisa podrške, lice zaduženo za prikupljanje potpisa obavezno upisuje ukupan broj potpisa na toj strani i potpisuje se na svaku stranicu obrasca. Ukoliko se ne unesu podaci o licu koje je prikupljalo potpise podrške, potpisi koji se nalaze na toj strani bit će odbijeni.
- (5) Prikupljene potpise podrške ovlašteno lice političke stranke ili nezavisnog kandidata obavezno unosi putem *online* portala “e-Izbori” na dalju obradu i provjeru u skladu s Uputstvom.
- (6) Politička stranka je dužna svojim aktom zadužiti lice koje će prikupljati potpise podrške, koje je odgovorno za tačnost i vjerodostojnost potpisa, i po zahtjevu Centralne izborne komisije BiH dužno je dostaviti predmetni akt.

## **Član 6.**

### **(Način podnošenja potpisa podrške – član 4.4 Izbornog zakona BiH)**

- (1) Politička stranka i nezavisni kandidat obavezni su prikupljati potpise podrške za izbor članova Predsjedništva Bosne i Hercegovine, u skladu s članom 4.4 stav (5) tačka 1. Izbornog zakona BiH.
- (2) Nezavisni kandidati obavezni su prikupljati potpise podrške za predsjednika Republike Srpske, u skladu s članom 4.9 Izbornog zakona BiH.
- (3) Politička stranka, odnosno stranka u koaliciji koja ima izabranog člana Predsjedništva Bosne i Hercegovine, nije oslobođena prikupljanja potpisa podrške ni za jedan organ za koji podnosi prijavu.
- (4) Potpisi podrške prikupljeni za izbor članova Predsjedništva Bosne i Hercegovine ne oslobađaju političku stranku obaveze prikupljanja potpisa podrške za izbor poslanika u Predstavničkom domu Parlamentarne skupštine Bosne i Hercegovine, Predstavničkom domu Parlamenta Federacije Bosne i Hercegovine, narodnih poslanika Narodne skupštine Republike Srpske, predsjednika i potpredsjednika Republike Srpske i poslanika u kantonalnim skupštinama.
- (5) Politička stranka koja prikupi potpise podrške za izbor poslanika u Predstavničkom domu Parlamentarne skupštine Bosne i Hercegovine nije u obavezi prikupljati potpise podrške za izbor poslanika Predstavničkog doma Parlamenta Federacije Bosne i Hercegovine, narodnih poslanika Narodne skupštine Republike Srpske, predsjednika i potpredsjednika Republike Srpske i poslanika u kantonalnim skupštinama.
- (6) Potpisi podrške prikupljeni za izbor poslanika u Predstavničkom domu Parlamenta Federacije Bosne i Hercegovine ne oslobađaju političku stranku obaveze prikupljanja potpisa podrške za Narodnu skupštinu Republike Srpske i obrnuto.
- (7) Politička stranka koja prikupi potpise za izbor predsjednika i potpredsjednika Republike Srpske oslobođena je obaveze prikupljanja potpisa podrške za izbor narodnih poslanika u Narodnoj skupštini Republike Srpske i obrnuto.
- (8) Politička stranka koja prikupi potpise podrške za izbor poslanika u Predstavničkom domu Parlamenta Federacije Bosne i Hercegovine nije u obavezi prikupljati potpise podrške za izbor poslanika u kantonalnim skupštinama.
- (9) Potpisi podrške za izbor poslanika u kantonalnoj skupštini prikupljaju se pojedinačno za svaku kantonalnu skupštinu.

## **Član 7.**

### **(Oslobađanje od obaveze prikupljanja potpisa podrške – član 4.5 Izbornog zakona BiH)**

- (1) Politička stranka koja ima mandat:
  - a) poslanika u Predstavničkom domu Parlamentarne skupštine Bosne i Hercegovine oslobođena je obaveze prikupljanja potpisa podrške za izbor poslanika u Predstavničkom domu Parlamentarne skupštine Bosne i Hercegovine u bilo kojoj izbornoj jedinici – Predstavničkog doma Parlamenta Federacije Bosne i Hercegovine, narodnih poslanika Narodne skupštine Republike Srpske, predsjednika i potpredsjednika Republike Srpske i poslanika u kantonalnim skupštinama;
  - b) poslanika u Predstavničkom domu Parlamenta Federacije Bosne i Hercegovine oslobođena je obaveze prikupljanja potpisa podrške za izbor poslanika u Predstavničkom domu Parlamenta Federacije Bosne i Hercegovine i poslanika u kantonalnim skupštinama;
  - c) poslanika u Narodnoj skupštini Republike Srpske oslobođena je obaveze prikupljanja potpisa podrške za izbor narodnih poslanika u Narodnoj skupštini Republike Srpske i predsjednika i potpredsjednika Republike Srpske i obrnuto; politička stranka koja ima mandat predsjednika i potpredsjednika Republike Srpske oslobođena je obaveze prikupljanja potpisa podrške za izbor predsjednika i potpredsjednika Republike Srpske i narodnih poslanika u Narodnoj skupštini Republike Srpske;

d) poslanika u kantonalnoj skupštini oslobođena je obaveze prikupljanja potpisa podrške samo za tu kantonalnu skupštinu.

(2) Mandat delegata u Domu naroda Parlamentarne skupštine Bosne i Hercegovine, Domu naroda Parlamenta Federacije Bosne i Hercegovine i Vijeću naroda Republike Srpske ne oslobađa političko subjekta obaveze prikupljanja potpisa podrške ni za jedan organ vlasti.

(3) Politički subjekt dostavlja potpisanu izjavu kojom potvrđuje da je izabrani zvaničnik tog subjekta osvojio mandat na Općim izborima 2022. godine i da je još uvijek član tog subjekta, koju Centralna izborna komisija BiH u proceduri ovjere provjerava s potvrđenim rezultatima izbora i bazom dodijeljenih mandata za Opće izbore 2022 godine.

(4) Osnov za oslobađanje od obaveze prikupljanja potpisa podrške iz stava (1) ovog člana su potvrđeni rezultati na posljednjim općim izborima.

### **Član 8.**

#### **(Koalicija kao nosilac mandata – članovi 4.13 i 4.15 Izbornog zakona BiH)**

Ako je mandat osvojila koalicija ili lista nezavisnih kandidata na Općim izborima 2022. godine, smatra se da su svaka politička stranka članica te koalicije ili svaki nezavisni kandidat na listi nezavisnih kandidata osvojili mandat i oslobođeni su obaveze prikupljanja potpisa podrške.

### **Član 9.**

#### **(Način provjere potpisa podrške – član 4.11 Izbornog zakona BiH)**

(1) Provjera potpisa podrške iz člana 4.4 stav (5) Izbornog zakona BiH obuhvata sljedeće radnje i postupke:

- a) provjeru jesu li politička stranka ili nezavisni kandidat dostavili originalni obrazac s potpisima podrške birača i je li identičan priloženom e-dokumentu;
- b) poređenje unesenih podataka putem *online* portala “e-Izbori” i podataka iz Centralnog biračkog spiska (podaci o JMB i izbornoj jedinici za koju birač ima pravo glasa), odnosno je li birač koji podržava političku stranku ili nezavisnog kandidata upisan u Centralni birački spisak za glasanje za izbornu jedinicu za koju se podnosi prijava za učešće na izborima;
- c) provjeru je li birač već dao potpis podrške za drugu političku stranku ili nezavisnog kandidata;
- d) provjeru je li unesen utvrđeni broj ispravnih podataka o potpisima podrške.

(2) Ukoliko je broj prihvaćenih originalnih potpisa jednak ili veći od broja originalnih potpisa podrške koji se zahtijeva prema odredbama člana 4.4 stav (5) Izbornog zakona BiH, Centralna izborna komisija BiH prihvatit će potpise podrške političke stranke ili nezavisnog kandidata.

(3) Za potpise podrške za koje se utvrdi da je dalo lice koje nije upisano u Centralni birački spisak kao birač ili nije upisano u nekoj od višečlanih izbornih jedinica za ogran vlasti za koji se podnose potpisi podrške, potpis će biti smatran nevažećim.

(4) Potpis podrške birača koji je podnesen za dvije ili više političkih stranaka ili nezavisnih kandidata bit će prihvaćen samo za političku stranku ili nezavisnog kandidata koji je prvi unio takav potpis putem *online* portala, a smatrat će se nevažećim za sve druge političke stranke ili nezavisne kandidate kojima je dat.

(5) Ukoliko su politička stranka ili nezavisni kandidat dostavili i unijeli broj potpisa podrške koji se zahtijeva prema odredbi člana 4.4 stav (5) Izbornog zakona BiH, ali isti ne sadrži dovoljan broj ispravnih potpisa podrške utvrđenih na osnovu provjera iz tačaka b) i c) ovog člana, dužni su u roku od dva dana od dana prijema obavještenja Centralne izborne komisije BiH otkloniti nepravilnost.

(6) Politička stranka ili nezavisni kandidat koji ne dopune broj nedostajućih potpisa podrške u predviđenom roku ili dopunjeni broj potpisa podrške nakon provjere bude manji od utvrđenog broja propisanog članom 4.4 stav (5) Izbornog zakona BiH, neće biti ovjereni za učešće na izborima, odnosno mogu biti ovjereni za onaj organ za koji je podnesen dovoljan broj validnih potpisa podrške.

(7) Politička stranka ili nezavisni kandidat za koje se utvrdi da su uz prijavu podnijeli manji broj potpisa podrške od zahtjevanog broja potpisa propisanog članom 4.4 stav (5) Izbornog zakona BiH, ili potpisi nisu u skladu s članom 5.13 stav (3) Izbornog zakona BiH, neće biti ovjereni za učešće na izborima, odnosno provjera potpisa podrške bit će izvršena samo za one organe vlasti za koje je podnesen dovoljan broj potpisa podrške.

**Član 10.**  
**(Određivanje šifre – član 4.22 stav (1) Izbornog zakona BiH)**

U svrhu vođenja evidencije o prijavama političkih subjekata za ovjeru učešća na izborima, Centralna izborna komisija BiH određuje posebne šifre s ciljem informatičke i statističke obrade podataka za političke subjekte koji podnesu prijavu za ovjeru za učešće na Općim izborima 2026. godine.

**Član 11.**  
**(Način podnošenja i obrada kandidatskih listi)**

- (1) Popunjavanje i preuzimanje obrazaca kandidatskih listi vrši se putem *online* portala “e-Izbori” za ovjerene političke subjekte, [www.izbori.ba](http://www.izbori.ba).
- (2) Unosom podataka o kandidatu putem *online* portala “e-Izbori” vrši se provjera ispunjavanja uvjeta kandidata za učešće na izborima, utvrđenih članom 4.2 Izbornog zakona BiH, te provjera usklađenosti kandidatske liste s članom 4.19 Izbornog zakona BiH.
- (3) Nakon unosa podataka o kandidatu te izvršene provjere iz stava (2) ovog člana, političkom subjektu omogućeno je preuzimanje i štampanje obrazaca kandidatskih listi putem *online* portala “e-Izbori”, [www.izbori.ba](http://www.izbori.ba).
- (4) Originalne obrasce kandidatskih listi, potpisane od strane ovlaštenog lica, s ovjerenom izjavom kandidata iz člana 4.19 stav (4) Izbornog zakona BiH, politički subjekt dužan je lično dostaviti u Centralnu izbornu komisiju BiH do roka utvrđenog u članu 4.21 Izbornog zakona BiH.
- (5) Raspored kandidata manje zastupljenog spola na kandidatskim listama utvrđen je članom 4.19 stav (3) Izbornog zakona BiH i vrši se prema Instrukciji o rasporedu kandidata manje zastupljenog spola na kandidatskim listama, koja je sastavni dio ovog Pravilnika.

**Član 12.**  
**(Prilozi)**

- (1) Sastavni dio ovog Pravilnika su forma i izgled sljedećih obrazaca:
  - a) Obrazac prijave za ovjeru političkih subjekata (političke stranke, nezavisnog kandidata, koalicije, liste nezavisnih kandidata);
  - b) Obrazac za prikupljanje potpisa podrške;
  - c) Obrasci za prijavu kandidatske liste i izjava kandidata te
  - d) Tabela zastupljenosti spola na kandidatskim listama – Instrukcija o rasporedu kandidata manje zastupljenog spola na kandidatskim listama.
- (2) Obrasci iz stava (1) tačke a), b), c) i d) ovog člana automatski se generiraju nakon pristupa aplikaciji i popunjavanja svih potrebnih podataka na *online* portalu “e-Izbori”, nakon čega će biti omogućeno preuzimanje i štampanje obrazaca u roku koji Centralna izborna komisija BiH utvrdi Uputstvom o rokovima i redoslijedu izbornih radnji.
- (3) Obrasci iz stava (1) ovog člana bit će štampani na jezicima i pismima koji su u službenoj upotrebi u Bosni i Hercegovini.
- (4) Prilikom podnošenja prijave političkog subjekta, u sjedištu Centralne izborne komisije BiH sačinjava se zapisnik te se potpisivanjem istog od strane političkog subjekta smatra da je politički subjekt upoznat s eventualnim nedostacima u prijavi.

**Član 13.**  
**(Upotreba izraza u muškom i ženskom rodu)**

Riječi koje su radi preglednosti u ovom Pravilniku navedene u jednom rodu, bez diskriminacije se odnose i na muški i na ženski rod.


**Član 14.**  
**(Prestanak primjene)**

Danom stupanja na snagu ovog Pravilnika prestaje primjena Pravilnika o prijavi i uvjetima za ovjeru političkih subjekata za učešće na Lokalnim izborima 2024. godine ("Službeni glasnik BiH", br. 31/24).

**Član 15.**  
**(Stupanje na snagu i objavljivanje u službenim glasilima)**

Ovaj Pravilnik stupa na snagu danom donošenja, a bit će objavljen u "Službenom glasniku BiH", "Službenim novinama FBiH", "Službenom glasniku RS", "Službenim novinama Brčko distrikta BiH" i na internet-stranici Centralne izborne komisije BiH [www.izbori.ba](http://www.izbori.ba).

Broj: 05-1-02-2-709-1/26  
Sarajevo, 06.05.2026. godine



Predsjednik

Jovan Kalaba